

2312 14
15.09.2014.



Šta nas čeka nakon hapšenja???

Pandora, Damask, Meso, Brend – iz ovih inovativnih naziva kriju se akcije Agencije za istrage i zaštitu – SIPA u kojima su (po nalogu tužilaštava) hapšeni osumnjičeni za različita kriminalna djela, od utaje poreza preko ratnih zločina do terorističkih aktivnosti. Rekao bi čovjek, krenulo je... Danova i mjesecima javnost traži da (konačno) neko odgovara za kriminal svih vrsta kojeg u ovoj zemlji ima i previše.

Da li zbog toga što su se približili izbori (pa valja pred birače sa peškešom) ili je stvarno dogorjelo do nokata pa više niko normalan u ovoj državi ne može žmiriti na lopovluk koji se dešava "pred nosom" i onih na vlasti, a i onih u opoziciji, tek SIPA je svoj dio posla završila. Postupila po nalogu nadležne instance, privela osumnjičene i tu negdje otprilike završava njihov posao.

Moram vam priznati da se ja pomalo bojam nastavka i onoga što će se dešavati u tužilaštvinama i sudovima. Bojam se procesa koji će trajati godinama poput loših indijskih ili meksičkih sapunica, namjerno ili nenamjerno napravljenih proceduralnih grešaka u pripremama optužnice, upitnih svjedoka ili sudskih vjestaka, prvostepenih presuda koje iole sposobniji advokat obori na narednoj instanci, drakonskih odšteta za duševnu bol, izgubljeni ugled i sl. koje dobijaju optuženi, a što plaćaju građani ove države...

Ima ih, mislim grešaka, toliko po već uhodanim matricama da ne mogu da se ne zapitam da li su stvarno svi dobri krivičari, parničari, pravnici u ovoj državi otišli u advokate, a da su oni koji nikako nisu mogli u advokate (i notare, molim) završili kao tužitelji (moram priznati da mi je napamet padalo i da se radi o nekom dogovoru u pravosudnom trouglu, ali to je već teorija zavjere, a time se ne bih bavila). Iako se u razgovorima često može čuti da tužitelji i sudije nisu ništa manje imuni na političku ili bilo koju drugu korupciju, lično sam mišljenja da ih takvi stavovi zapravo precjenjuju... Radi se, naime, o, po državu i njene gradane, kobnom i nezamislivom neznanju koje ubija... Metaforički, ali i bukvalno nažalost.

Možda sam dosadna i ponavljam se, ali je krajnje vrijeme da se definira način i metod kako da tužitelji i sudije odgovaraju sudu javnosti za ono što rade. Apsolutno sam protiv svake vrste pritiska na pravosudne organe, ali mislim da je vakat da se javnosti predoči ozbiljna analiza rada pravosudnih institucija i svakog tužitelja i sudije ponaosob. Ako već SIPA otvara Pandorinu kutiju u Damasku, da nam Brendirano Meso ne zasmrdi... ■

Aida Delić,
glavna i odgovorna urednica